

REGIONAL NEWS BULLETIN

Tuesday, September 16, 2025

HEADLINES (MORNING):-

- 1. Adviser to Chief Minister Pu TBC Lalvenchhungan CSS hnathawk an dah ngheh theih loh chhan chu danin a remtih loh vang a ni a ti.
- 2. CSS hnuaia thawk intelkhawm AMCECC-in waviin hian Mizoram hmun hrang hrangah lungawi lohna lantir chhunzawm an tum.
- 3. Prime Minister Narendra Modia chuan India Sipai te chu fakin Operation Sindoor ah an huaisenzia an tilang a ti.
- 4. Union Road Transport and Highway Minister Nitin Gadkari chuan India chu khawvelah lirthei zawrhna ram lian pathumna a ni tawh tih a sawi.

<><><>

TBC

Adviser to Chief Minister (Finance & Planning) Pu TBC Lalvenchhunga CSS hnathawk an dah ngheh theih loh chhan chu danin a remtih loh vang a ni a ti.

Nimina ZPM Party inkhawm Aizawl-a an office a neihah he thu hi sawiin Pu TBC Lalvenchhunga chuan Dan chu zah tur a ni a, dik taka rorel theih nan huai ngam tur a ni, a ti.

MLA leh Minister-te zim luai luai chu hman ata tawh Mizo mipuite chin than a ni a, waviinah chuan bansan a hun tawh tih sawiin FCAA chungchang a ni emaw, thil dang dangah pawh hrutute thu sawi awih a pawimawh a, an dik tawh lohna pawh sawisel ngam tur a ni a ti a, he ram tana an chan tawhna chu an chan tawh ni se, he ram tan a dang pawh chan ngam leh pawh huam a ngai a ni a ti.

(PR)

<><><>

CSS

CSS hnuaia thawk intelkhawm All Mizoram CSS Employees Coordination Committee AMCECC-in lungawi lohna lantir chhunzawm an tum laiin, Aizawl District Magistrate chuan thla 2 chhung Sawrkar Office awmna hmun hrang hrangah mi 5 aia tam punkhawm khapna a tichhuak.

Aizawl District Magistrate –thuchhuah tarlan danin tunlai hian Sawrkar lakah thil phut neiin pawl lungawilo, nawrh huaihawt mek an awm thu an dawng a, a hnuaia hnathawk ten harsatna an tawh loh chu Sawrkar duh dan ber a ni a, thil duhawm loh a thlen loh nan leh thlamuang taka Sawrkar hnathawk ten an hna an thawh theih nan Aizawl District huam chhunga Sawrkar Office awmna hmun hrang hrang Raj Bhawan, Chief Minister's Office, Mizoram Assembly Secretariat, MINECO leh a chheh vèlah sawrkar, politics, sakhuana, vantlang leh thil dang engvang mahin mi 5 aia tam punkhawm leh bengchhen khap tlat a ni tih a sawi.

Hemi chungchanga Akashvani Aizawl zawhna chhangin AMCECC General Secretary Pu Vanlalpeka chuan Mizoram sorkar laka lungawi lohna lantir nan waviina MINECO open gym kawta sit-in-demonstration neih an tum laia Aizawl District Magistrate-in mi 5 aia tam punkhawm a khap tih sorkarin a puan tak avangin an kal zel dan tur hi an ngaihtuah tha leh a, lungawilohna an lantir dan hi tur hi waviin hian an puangzar dawn chauh a ni.

AMCECC hian Mizoram sorkar laka an thil phut hrang hrang chungchangah thu lawmawm hriat tur a awm loh avangin lungawi lohna lantir nan tun thla September ni 9 atanga ni 11 thleng khan Mass Casual Leave an lo la tawh a ni.

<><><>

GST REFORMS

Tun thla ni 22 atanga GST rate thar hman tur chu Consumer ten sum lalut tlem zawkte khawsak awlsam zawk nan leh hetiang a thil an lei zung zungna sum hmanga ramchhung sum leh pai dinhmun chet tir tumna vang tih mithiam ten an sawi.

Pachhunga College Economics Dept, Asst Professor Dr Daniel Lalawmpuia chuan chhiah a hniamin miin thil a lei theih chu a pung dawn a, sum a hlu sawt anga, thil lei theih a tam zawk anga, sum lakluh pawh a tam zawk dawn a ni a ti.

Hetihlai hian, Commissionerate of State Tax, Deputy Commissioner Lalruatpuia chuan GST nei sumdawngte chuan GST rate tlakhniamna bungraw man te an tihnam ve lo a nih chuan hrem theih an ni a ti.

Akashvani Aizawl chuan sorkar laipuiin GST a siamthatna GST 2.0 chungchangah mithiam hrang hrang a kawm a, hetah hian State Tax Dy. Commissioner Pu Lalruatpuia chuan GST 2.0 hnuaia thil man tlahniam tur langsar

zual zingah, cement, leh bawngnhnute te a tel tih sawiin, sorkar laipui chuan GST rate a tihdanglam tak avangin company te chu MRP thar neih a phalsak bawk a ti a. GST danah chuan Anti-Profiteering measures a awm tih sawiin, GST nei sumdawngte chuan GST rate tlakhniamna bungraw man te an tihniam ve lo a nih chuan hrem theih an a, September ni 22 atanga GST rate thar hman hunah rate tihhniam tawh, man to a la zuar hriate chu taxation office-ah hriattir turin mipuite a chah a, GST rate thar chuan sumdawngte leh sorkar ni lovin mipui nawlpui, leh loneitute hlawkna tur a ngaihtuah ber tih a sawi bawk a ni.

Pu Lalruatpuia chuan GST-a pawimawh ber chu Tax Invoice a ni tih sawiin, GST registration nei chuan a dawr chhungah thil leitute hmuh theih turin GST registration nei a ni tih a tar ngei ngei tur a ni a, cheng 200 man aia tam an bungraw leitute hnenah tax invoice an pe ngei ngei tur a ni tih sawiin, hei hi cash memo a ni lo a ti a, invoice-a chhiah pek mil thlapin tax department-ah chhiah a chhung ang a, tax department chuan an chhiah chhun luh leh a invoice pek chhuah hmangin a dik ngei tih an lo finfiah a ngai tawh dawn a ti a, hei hi sumdawngte leh a leituten ngaipawimawh nachang an hre thin lova, dan anga hrem kher ngai lovin mipuite chu hre turin a chah a ni.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

Sawrkarin GST rate thar a siamah hian infiamna bungruaachte zaa 12 atangin zaa 5 ah tihhniam a ni a. Hei hian infiamna tihlar kawngah leh naupangte tan infiamna a tilar dawn a ni.Jharkhand-a Ranchi-a khawsa Neil Bharti chuan he GST thar hian infiamnaa tuite a ti phur viau ang a ti.

<><><>

MNF

MNF Party General Secretary Prof. F. Lalnunmawia, Ex-MLA chuan In humhimna dan nei ve lo te pawhin huaisen taka an ram leilung leh ramngaw tihchhiat tur an dodal laia, Mizote hmanraw neih Article 371(G) chu eng anga tha leh chak nge tih pawh enchhin ngam lo leh tang eih lova sorkar in FCAA 2023 a pawmpui chu a pawi hle a ti.

Nimina MNF Party Office, Hnam Run a thu a sawinaah Pu F Lalnunmawia chjuan FCAA-2023 hian Mizote hma hunah eng angin nge nghawng thalo a neih theih tih cjiZPM Research Wing leh VUC te ten zirchiang leh deuh se a ti a; Research-base in hal ngei se a ti a ni.

FCAA chu Environment leh zofate hmalam hun hriltu pawimawh tak a nih theih avangin thalai te leh zirlaite pawhin an ngaihven a tul hle a ti a. FCAA-2023 hmang hian ram leh ramngawte an hun reilote chhungin an ti chereu vek kher lo ang. Mahse, hun lokal zel turah Project pawimawh (National Importance) changchawiin zawi zawiin Mizoram zimteah Sorkar laipuiin Defence installation leh Mineral resources haichhuahna lamah awlsam zawk hmalak theihna kawng a rawn hawng ta a ni,” a ti.

Prof. Lalnunmawia chuan, Mizoramin hma sawn zel se an ti theuh a, zoram thalaite pawhin hmasawn chu an thlahlel a ni. Chutih rual chuan Development project - kawngpui sial leh leihnua atanga thil laih chhuah hian nasa takin Environment ah nghawng thalo a nei thin - ramngaw a ti chereu a, tuihna a ti tlem a, leilung, tui leh boruak bawhlhlawh a siam a, nungchate bakah mihring hriselna in a tuar a; ngaw thiah (vangin ramsa, sava leh nungcha te nunphung a ti buai thin,” a ti.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Wawiin chawhnu dar 2 leh a chanve-ah Chanchinthar puan leh a ni ang.

<><><>

BJP

Mara Autonomous Dist Council Chief Executive Member Pu M Laikaw an Mizoram tana hmalakkan tum dan ang ngeia hma an lak theih nan BJP chuan Sorkarna an siam ngei a ngai a ti.

BJP Mizoram State Office, Mipui Rûn-ah Karthar Inhlanna leh Political Session nimina neihah he thu hi sawiin, Pu Laikaw chuan, BJP Siaha District-te chuan theih tawp chhuahin hma an la a, MLA pahnih an thawh chhuak thei a, District dange atang pawhin an District theuh ah MLA an neih theih ngei nan State President kaihhruaina hnuaiah hma an la ang a ti a ni.

Pu Laikaw chuan tun hmam Congress Party-in BJP lo lian tur an hriat lawk avangin Kristian State ho ah BJP chu Anti-Christian tiin an sawi a, Muslim tamna ah BJP chu Anti -Muslim an ni an ti leh a, Congress-in BJP an puhmawh thinna chu engah mah ngai lo an awm chho ta zel a, chutihrualin Congress Party-ina a beihna la awih tlat nu leh pa tam tak te hrilhfiar chu an mawhphurhna a ni a ti.

Lai Autonomous Dist Council CEM Pu N. Zangura pawhin thusawiin LADC ah BJP leh a thawhpui 'UDA' te'n fiahna an paltlang a, hun kal ta a, ZPM MDC Pu Tuturu Singh-a pawhin an Party a thlawp piah lamah BJP a zawm nghal bawk a ti a, LADC-ah BJP leh a thawhpui te'n nghet takin lungtual takin Sorkarna an siam mek a ni," a ti.

Pu N Zangura chuan, Ram leh hnam ngaih pawimawh avangin Party chhuahsan emaw siam rem a tul chang a awm thin ni a sawiin, hetihlai hian mahni leh chhungkaw bil hamthatna tur chauha Politics khelh erawh a fuh

lova, chutiang mi te chuan an daih rei thei ngai lo a ni a ti. Pu Zangura chuan tualto Party atang in Ram siam thatna tak tak a awm thei lo a tih sawiin hei hi a chhan chu, thil tak tak tihna tur State Sorkar atangin a awm loh vang a ni a ti.

(PR)

<><><>

PM MODI

Prime Minister Narendra Modia chuan Indian Sipai te chu fakin Operation Sindoor ah an huaisenzia an tilang a ti. Nimina ni thum awh Combined Commanders Conference,Kolkatta neih a hawwnaah he thu hi sawiin Pu Modia chuan ram indin chhohnaah sipaite chuan an thawhhlawk hle a ti a. Hmelma do tura inpeih kawngah tun aia thaa inpuahchah zel a pawimawh thu a sawi a. Defence Ministry chu thawhhona tha leh ngaihtuahna thar neih kawngah hmalakna tha tak nei turin a chah a ni.

(Newsonair)

<><><>

UNION ROAD TRANSPORT MINISTER GADKARI

Union Road Transport and Highway Minister Nitin Gadkari chuan India chu khawvelah lirthei zawrhna ram lian pathumna a ni tawh tih sawiin Japan a khum tawh a ti. Nimina International Value Summit 2025 a hawwnaah he thu hi sawiin Pu Gadkari chuan kum nga lo awm turah India hian dinhmun sang ber luah a tum a ti a. Tunah hian boruak bawlhhlawh pe chhuak lo chi lirthei siamchhuaktu ram lian a ni tawh tih sawiin hmasawwna ruhrel lamah ngaihtuahna thar pawh neih chhoh zel a ni a ti bawk.

(Newsonair)

<><><>

SEVA PARV

Mipui rawngbawl leh sawrkar inrelbawlna tha tih thupuia neiin Prime Minister Modia sawrkar chuan hmasawwna thlen turin theihtawp a chhuah a. Tun tum Seva Parv hunah chuan Energty thianghlim leh hmannawn theih uar kawngah Modia sawrkar hmalakna tarlang ila. Kum 10 kalta chhung khkan insiamthatna chhinchhiahtlak tak tak neih a ni a. Ni tha leh thli tha hman kawngah khawvel hmahruaitu ni mekin flagship program tha tak tak neih a ni a. India chuan hmalam hunah energy thianghlim leh mahni intofelh turin chak takin hma a la a ni.

(Newsonair)

<><><>